





東海漁歌卷三

柳井文庫

西林願

春太清著

鷓鴣天

元日詠薺菜用去年韻

鮮薺登盤乍吐花嫩苗爭長傲春奢已
知草色迎年綠略有新黃發柳芽 山
之罅水之涯風絲日影煖相加歲朝圖
上應添寫小白微青最可誇

玉連環影

元日解九連環

連絡箇箇環相約解得開時本自無纏
縛繫連環解連環一笑人間萬事理皆
然

琴調相思引

題百福老人藍筆畫蘭

同心芳草澹青鉤豔過春花冷過秋翰
林學士畫意本清幽 神品倩人題好
句生綃尚有暗香留老人名字千古足

風流

滿江紅

人日觀音院餞雲姜南歸

歸去來兮怕君去少留君坐說不盡離
愁彼此淚隨聲墮野店長途當自愛脂
車秣馬須親課報平安兩字寄書頻君
休惰新年事匆匆過久初解東風大
隔江關千里相思無那今日分襟何日
見觀音不管人些箇聽一聲珍重去難

留傷心我

風入松

春燈次夫子韻二首

沿河新艸綠堪挑，絲柳漸垂條。六鰲海上，
上凌風至，獻明珠火樹蟠桃。十里朱闌，
畫閣滿天，月璧星軺。太平樂事慶清
朝，結伴走天橋。鈿車游馬，笙歌隊望，青
帘春酒新燒。紅燭緣街引路，浮圓到處。
元宵

華堂春暖設春筵燈彩月華天上元南
極開芳宴宴羣仙香裊雲盤彩服庭前
兒女貂裘門下衣冠 春王寶籙注延
年松柏蔭常圓喜君與我生同歲祝三
多樂勝從前好景何如今夕新詩載入

芸編

自注十六日
夫子誕日

醉紅妝

自題海棠摺扇贈雲林

薄寒輕暖近清明試新粧出華清宿醒

未解尚懵騰嬌無那畫欄憑
碎紅滴露染猩猩燒絳燭照娉婷
須知畫意卽詩情三五朵一枝橫

鵲橋仙

雲林囑題閏七夕聯吟圖

新秋逢閏鵲橫重駕兩度人間乞巧參
橫月轉玉繩低問乞得天機多少
閏中女伴天邊佳會多事紛紛祈禱總然
天上有神仙怕也共有情天老

浪淘沙

正月廿七聞雁憶雲姜

別後數征郵應到揚州相思一日似三
秋惱煞雁行天上字字字離愁 回首
憶春游花底句畱三分春又一分休屈
指海棠開日近不見歸舟

金縷曲

自題聽雪小照

兀對殘燈讀聽窻前蕭蕭一片寒聲敲

竹坐到夜深風更緊壁暗燈花如菽覺
翠袖衣單生粟自起鉤簾看夜色壓梅
梢萬點臨流玉飛霰急響高屋亂雲
堆絮迷空谷入蒼茫久花冷蕊不分林
麓多少詩情頻到耳花氣薰人芬馥特
寫入生綃橫幅豈爲平生偏愛雪爲人
間留取真眉目闌干曲立幽獨

一剪梅

聞雲姜渡河信

聞道行程已渡黃江北淮南雲樹蒼茫
錦書春信遠相將嗟我懷人寘彼周行
兩岸青山客夢長千里相思一日難
忘綠楊城郭近雷塘所謂伊人在水一
方

杏花天

同游南谷雲林妹先返悵然賦
此

倚樓目送人歸去望不盡杏花深處香

車轉過山前路苦被垂楊遮住 方七
日唱予和汝匆匆返去而不顧雖云小
別愁難訴彼此相思情互情深乃爾
是亦獨船

更漏子

憶雲林

雨絲絲風細細盡是銷魂滋味風細細
雨絲絲相思十二時 我憶君君憶我
我不憶君甯可君憶我我憶君愁腸似
轉輪

柳烟柔花影細誰解箇中滋味亂愁緒
萬千絲春光能幾時奈何君惆悵我
一別如斯安可惆悵我奈何君流年快
似輪

如夢令

送春

昨日送春歸了枝上殘紅漸少簾外綠
陰多滿地落花誰掃休掃休掃一任東
風吹老

伊州三臺

題雲林扇頭彈琴仕女

西風吹入梧桐半捲珠簾露濃獨坐月
明中正閒階幾聲暗蟲 人間天上情
蹤泛以久絲細通一曲忒愁儂□□□□
□□□□□□

探春慢

題顧螺峯女史韶畫尋梅仕女

用張玉田韻

寒浦藏烟小橋堆絮人與花分清澹竹
壓低枝松扶老幹簌簌璫英霏霰纔試
着花氣早望見朱闌一半若非羣玉山
頭明月林下香散 可是漢家宮苑又
不似唐昌樹底忽見黃鶴樓中玉門關
外休付笛聲吹怨留待東風至卻還怕
綠陰爭煖笑撚花枝歸來香滿庭院

浣溪沙

謝雲林妹見贈自畫櫻筍團扇

芍藥將開卸海棠最憐櫻笋好年光落
花庭院綠陰長 寫就新圖顏色嫩書
成小令墨痕香也憑紅翠競春芳

江城子

題孫子勤西溪紀游圖

西溪溪水拍長天放游船足流連一片
蘆梢飛雪滿前灘仙侶同舟歸去晚夕
陽下起寒烟 乘流欲上白雲間小槁
邊浪花圓只有忘機鷗鷺對人閒迴首

茅庵紅葉裏僧送客倚闌杆不煩色澤漸近深穩

菩薩蠻

夏日

薰風殿閣櫻桃節碧紗窓下沈檀爇小
扇引微涼悠悠夏日長野人風趣甚
不作炎涼問老圃好栽培菊花五月開
闌千萬里心

聽雨憶雲林

窓前新種綠芭蕉夜雨聲聲枕上敲困

不成眠轉寂寥耐清宵有美人今不可
招

琴調相思引

雲林妹見贈雁足書燈以小令
申謝

雁字分飛思不禁聽風聽雨夢難尋露
華庭院燈影照清心 贈我不須長夜
飲感君聊賦短檠吟熒熒一點應惜寸
光陰

鵲橋仙

題孫松岑閱音修篁圖

許雲林少君

琅玕一徑瑤琴三弄人在清涼極處蕭
蕭疑雨又疑風倚怪石蒼苔珠樹雲
中仙鶴花間雛鳳萬里丹山平步更邀
明月照幽篁消受者滿身香霧

賀新涼

夏日余季瑛招飲淨綠山房作
小宴神仙宅坐蒼茫迴廊曲折高槐如

幄海上荔支枝頭杏玉斗香斟雲液愛
雪藕久盤清潔卜築山房成大隱羨主
人瀟灑能留客盡一日花間酌地偏
心遠無塵迹倒清尊羣賢咸集騁懷游
目西下夕陽雲乍起一霎電雷交作風
過處新涼如沐雨後沿階芳草色映久
綃霧縠衣裳碧歸未晚不須燭不必以
矜鍊勝
饒有清氣
撲人眉宇

意難忘

自題梅竹雙清圖

一徑幽香傍猗猗修竹疏影扶將橫斜
深院宇冷艷小池塘纔雪後乍芬芳儘
無語持觴向夜闌巡檐索句特費思量
相思難話衷腸想佳人空谷一樣情
傷簾櫳燈黯澹籬落月昏黃多少事意
難忘似不自禁當更怕他新愁舊夢虛
度年光

碧芙蓉

雨後由三官殿同雲林紉蘭過
尺五莊看荷花作

一帶小紅橋同倚畫闌池面荷靚颯颯
蘆梢立蜻蜓不定新雨過瑠珠萬點蕩
流霞妙蓮香冷聽垂楊岸幾樹鳴蟬催
起游人興 虛庭縈曲沼望不盡綠葉
千柄隔水盈盈似美人臨鏡雪欠藕涼
生袂薄泛清尊風吹酒醒斷雲殘照漸
花外天光向暝

清雋沈著
恰到好處

南柯子

詠香串效唐人體

寶串垂襟軟溫香著體柔青絲貫取意
綢繆只要心心相應總無愁步月難
尋夢臨風怕倚樓江皋玉佩爲誰留又
惹一番牽挂在心頭

浪淘沙

送珊枝歸武林

歸計太匆匆難寫離悰孤帆雙槳趁秋

風腸斷天涯從此去甚日重逢 判袂
各西東浪跡萍蹤憐君多病近龍鍾一
紙音書勞悵望須付征鴻

伊州三臺

七夕夜雨次日立秋戲題

秋聲先到芭蕉階下秋蟲絮叨生受鵲
填橋渡銀河夜涼路遙 洗車絲雨飄
蕭冷落星娥翠翹雲氣濕輕綃願來年
莫同者遭

迷神引

題徐廷昆畫

叠叠銀濤翻雪浪黯黯冷雲飛漲垂藤
古木石壁高無量望蓬萊三山遠長風
蕩日月雙丸小來復往天地渺無涯窈
空曠忽有仙舟一葉乘波放看鞦韆凌
波蘭爲漿滿盤花果玉瓶貯蒲桃釀是
廣寒宮霓裳舞月中樣白兔守筠籠隨
竹舫猿子采蟠桃親呈上

江城梅花引

雨中接雲姜信

故人千里寄書來快些開慢些開不知
書中安否費疑猜別後炎涼時序改江
南北動離愁自徘徊徘徊徘徊渺予
懷天一涯水一涯夢也夢也夢不見當
日裙釵誰念碧雲凝竚費腸迴明歲君
歸重見我應不是別離時舊形骸

情文相生

自然
合拍

步虛詞

中秋

玉剪燕歸秋社木犀香浸雲屏連陰初
霽月華清惱煞碧天風勁 細露涼生
鈿閣流雲暗度瑤京羽衣纖指學吹笙
不許人間偷聽

燕歸梁

自題畫杏

得意東風快馬蹄細草沙隄幾枝豐艷

照清溪垂楊外小橋西
寫來還恐神難似肥和瘦
要相宜碧紗窓下倩君題
聊記取舊遊時

風入松

題王叔明聽松圖

亂山深處有人家細路欹斜長松萬樹
圍茅屋響寒濤天際青霞曲澗平鋪畧
約飛泉高挂檐牙幽人肥遁厭煩譁
雲水生涯攜筇來有談經客露疎窓蘿

薜周遮陋室居之何陋滿堂金玉無加

凌波曲

孫媿如女士囑題吹笛仕女團

扇

西風露零高樓笛聲無端吹起離情落
梧桐葉輕三更四更雲窻未扃小蟾
斜影分明挂闌干正平

東風齊著力

水波 得平字

燕子來時迴塘向煖野水烟生剛勝弱
絮初泛落花輕漫漫垂楊曲沼纔添了
幾點浮萍魚苗長生機浩蕩恰趁新晴
霧縠太輕盈波細細參差碧浪縱橫
遙天倒影渺渺動柔情好是東風消息
吹不定似皺還平天涯一篙新漲萬里
春程

刻畫工緻是矜心作意
而爲之然亦不犯雕琢

廣寒秋

九月十九日過天仙庵同福眞

老尼茶話

禪房寂靜蒼苔濃厚冷澹斜陽陰裏去
年曾到又重來正幽徑黃花開矣 冷
風輕颺梅檀香靄恰可衆心歡喜一杯
清茗話西窗漸薄暮鐘聲初起

金縷曲

送紉蘭妹往大梁

三載交情重竟難留買舟南去北風初
動行李蕭蕭天氣冷落葉黃花相送正

河水久澌將凍滿載異書千萬卷有斯
冰小印隨粧籠千里路全家共年來
送客愁相踵要相逢都門汴水與君同
夢此後平安書屢寄慰我愁懷種種灑
清淚離觴互捧聚散本來無定數古陽
關不忍當筵弄金縷曲爲君誦自注正
月初七

送雲姜歸揚州七月初五送珊枝
歸武林 妥帖易施卻不犯滑

傳言玉女

雪夜不寐

一夜風威燈暈踈牕微照雲母屏風護
羅幃寒峭黃花影裏數盡更籌多少新
愁舊悶竟難忘了多病何堪紛緒亂
縈懷抱茶鐺藥裏颺輕烟香杳稜稜瘦
骨顧影翻然成笑游仙有夢也應顛倒

浣溪沙

游仙體用遙知楊柳是門處似
隔芙蓉無路通成此小令二闋
碧落茫茫秋水斜朱門深被綠楊遮隔

溪聽盡晚蟬譁 無可奈何人悵望難
通消息樹交加能忘情者是仙家

開徧芙蓉葉葉涼天成錦障護池塘伊
人宛在水中央 十二闌干人不見三
千世界路何長空教秋雨洗紅粧

祝英臺近

潭柘龍潭用夢窗韻

古松陰幽澗底流水漱山股紅葉寒烟
飛鳥自來去蒼茫草界羊蹤霜封樵徑

石頭滑輿夫相語 酌清俎穿林瑟瑟
風吹陰厓望堆素縹緲峯頭指點過來
路平臨佛刹巍峩鐘聲初起梵音散諸
天花雨 近緊勁

菩薩蠻

西觀音洞

朝陽初上岩頭樹清晨步入蠶叢路雲
隱小紅牆鐘聲發上方 高碑書故事
苔蘚侵碑字大士坐蓮台蓮花何處開

自注碑記初爲
蓮池今已無

東觀音洞

斜陽乍轉夕陰結
觀音古洞寒泉冽
黃葉擁禪關
山僧終日閒
石橋通曲徑
樹杪棲烏定
修竹暗森森
悠然淨客心

西峯寺

羅睺嶺下蒼烟織
亂雲深谷披荆棘
紅葉被山阿
寒林廢塔多
寺門殘照裏
古洞餘荒址
殿角秀長春
花開日日新

登石景山天空寺望渾河

渾河東岸孤峯起崔巍絕頂浮圖峙陡
闢四天門天空祇樹園登高同策馬
陟彼尋蘭若競渡俛長橋霜華曉未消

浪淘沙慢

久不接雲姜信用柳耆卿韻

又盼到冬深不見故人消息況當雪後
幾枝寒梅萼綠如滴對疏香瘦影思佳
客細思量兩地相思怕夢裏行蹤無準

各自都成悲戚 無極九迴柔腸十分
幽怨幾度寫付宮闕鴻雁空延伫雖暫
成小別也勞心力回首當初在衆香國
裏花同惜恁無端雪來柳往天天使人
疏隔知何時共翦西窗燭萬千言與語
叨叨向說卻還愁說不盡從前相憶樸實
言情宋人法乳非纖豔之
筆藻續之工所能夢見

東海漁歌卷三

東海漁歌卷四

西林顧 春太清著

蟾宮曲

立春

暢晴和好是今朝律轉青陽冶葉倡條
暖入屠蘇宜春剪字彩勝雲翹 碧瑠
璃房攏日高繡簾兒東風細飄臘雪全
消春到人間柳寵花嬌

伊州三臺

猗蘭曲

蘭兮生自空山流出幽香世間清露潤
芳顏託離騷美人意傳 休誇霧鬢烟
鬟不與羣花並看描寫入久弦數芬芳
算伊占先

醉太平

題蓉桂雙白頭圖

金風素秋露華暗浮天容夜色幽幽挂
涼蟾一鉤 芙蓉太柔木犀漸稠白頭

同宿枝頭笑鴛鴦逐流

風光好

春日

好時光
恁天長
正月游蜂出蜜房
爲人忙
探春最是沿河好
烟絲裊誰把柔
絲染嫩黃
大文章

浪淘沙

登香山望昆明湖

碧瓦指離宮
樓閣玲瓏
遙看草色有無

中最好是一年春好處烟柳空濛 湖水
自流東橋影垂虹三山秀氣爲誰鍾武
帝旌旗都不見鬱鬱蟠龍

貂裘換酒

題扇頭雞聲茅店月人跡板橋

霜畫意

拂面西風冷挂林梢微茫澹月碧空澄
淨已被雞聲催人起漠漠淺沙幽徑舞
黃葉隨風不定店舍無烟關山遠漸輪

蹄驚動棲烏醒襟袖裂曉寒勁 新霜
路滑鞭敲鐙板橋頭蕭蕭寒溜明星尚
炯指點前村依稀見野火孤燈相映望
不盡魚天耿耿一片朝霞烘遠樹湧紅
暎宿草霜華瑩雲斷處誤山影

壽樓春

送春

鶻聲中春歸奈息息不住輕送芳菲幾
處園林池館落紅霏霏無意緒裁春衣

想去年百花开時記剪燭山樓看花古
寺回首夢依稀誰能禁東風吹倚闌
干幾曲時與心違又是楊花糝徑海棠
垂絲春已去人如斯更那堪幽思空悲
對芳草深庭簾櫳未垂雙燕飛肆口而成
喫力似此功候確
從宋詞中得來

南鄉子

雲林招遊三官廟看海棠不果
行用來韻答之

鬯好看花天漠漠輕陰颺柳烟最是海
棠嬌太甚躑跰半要人憐半自憐 風
信莫狂顛艷色能留幾日鮮分付封姨
休掃卻嫣然似帶餘醒晚更妍

小葉碧玲瓏十二闌干護幾重不是不
知春已去微風也向枝頭颺落紅 花
氣靄房櫳芳意憨憨睡思濃倦態倩誰
扶欲起冥濛和雨和烟入畫中

首夏半晴天曲水無由繫畫船恨不共

君同一醉尊前飽聽飛璫綠綺絃

雲林善鼓

琴

塵事惜縈牽再到花時又一年佳

會自應多韻事相連遮莫紅粧綠蔭邊
野卉雜黃藍菜圃青青生意酣蝶繞疎
籬蜂逐絮毳毳柳拂新泥燕子啣樂
事記城南近水花光一鏡涵借問村醪
何處有青帘芳信知君未倦探

定風波

雨中海棠

曉起庭除徧落花亂紅和雨受風斜
惟許荼蘼同一夢寒重飄零殘粉誤韶華
滿樹輕陰垂綠綬賸有婷婷倩影護
檐牙切莫東風盡吹落斟酌枝頭紅萼
暫留些清穩絕
無時氣

江城子

落花

花開花落一年中惜殘紅怨東風惱煞
紛紛如雪撲簾櫳坐對飛花花事了春

又去太匆匆 惜花有恨與誰同
曉粧慵忒愁 儂燕子來時紅
雨畫樓東 儘有春愁啣不去
無才思是游蜂

一片空靈
天仙化人

之筆

春去也

飛絮

春去也 點點惜楊花落溷
飄茵無定準 任教風送到
天涯惆悵送年華

雪夜漁舟

題勵宗萬雪渡圖

朔風緊催雪滿羣山六花成陣水面凝
烟蘆梢戛玉敗葉亂隨風賈溪山妝粉
掩映出短籬疏影樹鴉驚起瀾漫村舍
板橋難認凍雲飛不盡望長空一色
水天深隱喚渡紛紛披簑戴笠銀海冷
先生暈去程遠近好乘取晚來風順蘭
橈桂槳空明擊泝畫圖詩境

並蒂芙蓉

題蔣南沙相國畫並蒂蓮花

水淨風疏映碧空
倒影花間無暑清
露洗紅粧解環佩
何許同心並頭兩
朵洛浦凌波笑相
與結成伴侶惜雙
雙占斷風流嬌嫵
曉鏡玉容比竝有
鰾鰾鰾鰾花閒來
去不肯畫鴛鴦怕
芳意輕妒嗤它尹
邢避面仿佛商量
凭肩語者般態度
願爲花總開一處

醜奴兒

花筩製自儀徵相國截竹不拘
長短穴其半以節爲底節節貯
水皆可插花或挂牆隅或排比
爲屏最佳者惟芍藥洋菊五色
絢爛燦若明霞詞以紀之

虛心直節爲筩好野卉倚葩排比紛拏
離合神光粲若霞 銅觚玉盞何須論
青綠交加縷篆雕花長短隨心不及他

金縷曲

戲述嬾

曉起臨妝嬾覺年來閒身多病神思苦
短誰耐宮鬟梳浮渲管甚胭脂濃淡更
誰問畫眉深淺辜負描花新樣好度金
鍼怕引絲絲綫薔薇露未須盥 研池
積水生苔蘚任窓前花花葉葉隨風飄
卷開卷難成終卷讀斷闕無心重按又
不是春醪醉晚瘦比黃花慵似柳繡羅
襦隨意腰圍緩嬾之病最難遣

金縷曲

雲臺相國屬題宋本金石錄

日暮來青鳥啓瑤函紙光如研香雲縹
縹風雅唱隨誇漱玉夏鼎商彝細攷聚
絕世人間瑰寶幾易滄桑悲散落賸琳
琅小束雕鐫妙挈經室爲長保 相公
白髮親籬校擁書城玉臺仙侶況兼同
好南渡烽煙驚瑣尾不盡亂離懷抱更
誰究言妖顛倒賴有名言爲昭雪按編

年證取宣文老蠅點壁淨如埽

自注謫傳易安

改適事雲臺相國及靜春劉夫人辯之最詳

惜花春起早

本意

曉禽鳴透紗窗黯黯淡淡花影小樓昨
 宵聽盡夜雨為著花事驚醒千紅萬紫
 生怕他隨風不定便匆匆自啓繡簾看
 尋徧芳徑 階前細草蒙茸承宿露涓
 涓香土微溼今番為花起早更不惜縷

金鞋冷雕闌畫檻歸去來閒庭幽靜賣
花聲趁東風恰恰催人臨鏡直入清真
室閨秀
中不能
有二

愛月夜眠遲

本意

樹影朦朧望小蟾乍湧人立桐陰草根
蟲語沾衣露下雙雙睡穩胎禽芭蕉掩
却紅燈天街夜色深沈又誰家一聲聲
不住敲動寒砧 當此月滿風微把久

絲再鼓譜入瑤琴井闌干外閃閃不定
螢火幾點難尋清輝暗轉花梢良宵一
刻千金想嫦娥也如我愛月不願更深

陽臺路

賦得手倦拋書午夢長效柳耆

卿體並次其韻

未天晚耐困人晝永詩書拋亂捲紗厨
隱几南窗神逐水沉香遠蓮隔了了
一枕夢遊柳愁花暖曾經慣舊路兒桃源

前度人散 悵望碧溪流 水好夢醒難
擡倦眼細思量處又惹下暗愁無限人
何在風裳水佩剩有綠陰幽館無端鳥
語驚迴從何消遣

此等詞非時下人所
能並非時下人所知

南鄉子

雲林囑題薰籠美人圖

窗外雪昏昏人倚薰籠畫掩門寒戀重
衾眠不起氤氳一瓣香濃誰與焚 寫
出畫中身淺黛愁含隔宿痕彷彿思量

多少事消魂何處行雲夢不真

喝火令

己亥驚蟄後一日雪中訪雲林
歸途雪已深矣遂拈小詞書於
燈下

別久情尤熱交深語更繁故人留我飲
芳罇已到雅棲時候窗影漸黃昏
拂面東風冷漫天春雪翻醉歸不怕閉城
門一路琉璃一路沒車痕一路遠山近

樹粧點玉乾坤

柳梢青

題寒月疏梅圖

老幹橫斜一枝初放低護檐牙雪後黃
昏吹來何處怨笛哀笳 久姿不共凡
葩照流水清心自誇冷淡花光朦朧月
影深院誰家

西子粧

三月十三邀余季英吳孟芬錢

伯芳陳素安諸姊妹小集紅雨

軒看海棠用吳夢窓韻

風信幾番半春過了絳雪吹成香霧待
看草色入簾青敞疎窻小軒花鴈東風
慢舞更分付留春且住願年年到花開
時候良朋如許休輕誤有限韶華不
許匆匆去蓬門花徑爲君開隔春陰海
棠盈樹拈題索句莫孤負陽春同賦最
關心萬點禁風著雨

南鄉子

惜花詞

一夜妒花風吹過闌干第幾重何事封
姨情太薄匆匆零落深叢與淺叢春
冷逼房櫳曉起開簾掃落紅風勢未停
天又雨濛濛亂捲飛花小院中

江神子

聽項屏山姊紉彈琴

畫堂春暖日光晴坐深庭泛瑤觥一曲

仙音許我醉中聽，雖是初逢如舊識。言
不盡話生平，落花風度水雲聲。韻冷
泠，特分明。真箇九皋長唳，近虛靈。聽到
曲終，人語靜，驀然使寸心清。琴名鶴鳴

沁園春

游常氏廢園用竹葉庵游孔氏

廢園韻

觸目荒涼小立，迴廊夕陽斜。認畫棟
粧樓，紅窓疎敞，長楸修竹，綠葉婆娑。滿

地濃陰一聲啼鳥喬木森森繞薜蘿玲
瓏石昉奇峯怪岫幾朵青螺 風流此
地經過賸玩月荒臺照素娥想當日繁
華而今安在一朝散盡妙舞清歌燭炮
香消光沈響絕過客空增感慨多風來
處聽檐鈴敲動猶似鳴珂

淒涼犯

詠殘荷用姜白石韻 社中課題

斜陽巷陌西風起池塘一帶蕭索露重

半垂月黃低冑畫闌斜角風情最惡更
不奈涼蟾影薄况飛飛社燕將歸鴻影
度沙漠 迴憶情何限隔葉傳歌對花
行樂無端青女暗行霜舞衣催落苦意
清心尚留得餘香細著更西窗剪燭話
雨訂後約

金縷曲

題桃園記傳奇

按譜桃園記灑桃花斑斑點點染成紅

淚飛絮落花長亭路難寄相思兩字徧
十二闌干空倚久雪肌膚瓊瑤想引情
絲蹙損春山翠仙家事也如此 凌風
駕月因誰起總無非心心相感情情不
已只爲情深深如海泛出慈航一葦渡
仙女仙郎雙美記取盟言桃花下問三
生石上誰安置合歡罍莫辭醉

茶瓶兒

病中謝閨友贈茶

病裏閒愁如織落花殘小庭人寂倦梳
慵裏渾無力恰寄到雨前新葉慰消
渴情何極泛清芬者般顏色綠塵飛盞
碧香生頰風定處竹鑪煙直

水調歌頭

中秋獨酌用東坡韻

雲淨月如洗風露湛青天不知今夕何
夕陳事憶當年多少銷魂滋味多少飄
萍踪跡頓覺此心寒何日卸塵鞅肥遯

水雲間 沃愁腸憑濁酒枕琴眠任他
素魄廣寒清影缺還團圓誰管春庚秋
蛩畢竟人生如寄各自得天全且盡杯
中物翹首對嬋娟

金風玉露相逢曲

中秋後一日同雲林湘佩家霞
仙雨中遊入寶山晚晴次湘佩
韻

寒烟冑樹涼風吹面雲外奇峰屏列相

期不負雨中游，仿佛是山陰。冒雪危
闌倚袖遙，天極目一片秋光清絕。敲詩
把酒晚晴初，臥夕照殘碑斷碣。

高山流水

聽琴 社中課題

七條絃上寫柔情，一絲絲彈動秋聲。風
拍小簾攏花陰，恰有人聽芭蕉影隔住。
紅燈分明是流水，高山絕調。戛玉敲久
更幽蘭製佩腕底散芳馨。泠泠虛空

度鴻雁寒浦外水淨沙平何處怨蒼梧
落葉舞徧風輕費鑪煙仁月曾停夜深
也還怕纖纖素指錯點明星悄無言恍
若江上數峯青

風入松

買菊

滿城風雨近重陽昨夜見微霜含苞細
認玲瓏葉問佳名色色端相出水芙蓉
玉扇落紅萬點霓裳 蕭條古寺集寒

芳何論價低昂買歸自向疎籬種伴園
蔬平占秋光知有白衣送酒已拌沈醉
花旁

瑤華

代許慎生六兄題海棠庵填詞
圖

閒庭日暮絳雪霏香遶海棠無數苔痕
草色自有箇人在花深深處故燒高燭
照春睡烏闌親譜衍波箋斟酌宮商付

與雙鬟低度 紅牙緩拍新聲正料峭
微寒花影當戶搓酥滴粉還又怕簾外
柳梢鶯妒春陰乍滿卻不是聽風聽雨
擅風流小樣迦陵一縷茶烟輕護

唐多令

十月十日屏山姊月下使蒼頭
送糠一袋以飼豬率成小令申

謝

風起又黃昏鴉棲靜不喧拍幽窻霜葉

翻翻把卷挑燈人未睡酌盃酒悄無言
明月滿前軒天高夜色寒幾推敲
竝立閉門穀膜米皮中有道君莫笑察雞
豚

踏莎行

夢次屏山韻

幻影浮泡原無憑據箇中變化紛如縷
也生歡喜也生愁故人往事相逢處
念切情真千頭萬緒趾離切莫將人誤

輕如蝴蝶膩如雲寒衾不耐天明雨

鵲橋仙

牽牛 社中課題

絲絲柔蔓層層密葉綠鎖柴門小院朦
朧殘月挂林梢早已是牽牛開滿一
天涼露半籬踈影縹緲銀河斜轉枉將
名字列星躔任織女相思不管

塞上秋

雁來紅 社中課題

惱人最是西風斷腸聽盡歸鴻誰把胭
脂畫工月明霜重染成芳草嬌紅

踏莎行

老境

老境蹉跎寄情緇素閒身拌作書叢蠹
年來多病故人疏生涯賴有山中兔
夢去嬀尋曲成自顧唾壺擊缺愁難賦
敢將淪謫怨靈修虛名蚤被文章誤
東海漁歌卷四

補遺

浪淘沙

春日同夫子慈溪紀遊

花木自成蹊春與人宜清流荇藻蕩參
差小鳥避人棲不定撲亂楊枝歸騎
踏香泥山影沈西鴛鴦衝破碧煙飛三
十六雙花樣好同浴清溪

南柯子

山行

締綌生涼意肩輿緩緩游連林梨棗綴
枝頭幾處背陰籬落挂牽牛 遠岫雲
初斂斜陽雨乍收牧蹤樵徑漸深幽昨
夜驟添溪水繞邨流

早春怨

春夜

楊柳風斜黃昏人靜睡穩棲鴉短燭燒
殘長更坐盡小篆添些 紅樓不閉窗
紗被一縷春痕暗遮澹澹輕煙溶溶院

落月在梨花

惜分釵

詠空沖

春將至晴天氣消閒坐看兒童戲借天
風鼓其中結綵爲繩截竹爲筒空空
人閒事觀愚智大都製器存深意理無
窮事無終實則能鳴虛則能容沖沖

醉翁操

題雲林湖月沁琴圖

悠然長天澄淵渺湖煙無邊清輝悵望
兮嬋娟有美人兮飛仙悄無言揚袖促
鳴絃照垂楊素蟾影偏 羨君志在流
水高山問君此際心共山閒水閒雲自
行而天寬月自明而露溥新聲和且圓
輕徽徐徐彈法曲散人閒夜深香靄非

麝蘭

右詞五闋見錢唐沈湘佩女史

善寶

閨秀詞話適爲三卷中所無當是編

入第二卷者甲寅六月蕙風詞隱記
東海漁歌三卷埶補遺五闋甲寅荷
花生日校畢各闋後閒綴評語太清
詞亦未即卓然成家閱者能知其詞
之所以爲佳再以評語參之則於倚
聲消息思過半矣蕙風再記

東海漁歌補遺

